



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Suai
Períodu Feveiru 2017

Afirmasaun: Sumáriu Kazu tuirmai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma laiha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza : 20

Artigu	Tipu Kazu	Númeru
Artigu 145 Kódigu Penál (KP) no konjuga ho artigu 2, 3, 35 36 LKVD	Ofensa ba integridade física simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	2
Artigu 177 KP	Abuzu seksuál ba menór	2
Artigu 172 KP	Violasaun seksuál	1
Artigu 154 KP no konjuga ho artigu 2, 3, no 35 no 36 LKVD	Maus trastus ba kónjuje	2
Artigu 23&138 KP no konjuga ho artigu 2, 3, 35 no 36 LKVD	Tentativa omisídiu simples ho natureza violénsia doméstika	1
Artigu 295 KP	Pekulatu	1
Artigu 146 KP	Ofensa ba integridade física grave	3
Artigu 148 KP	Ofensa ba integridade física negligente	1

Artigu 145 KP	Ofensa ba integridade fízika simples	4
Artigu 258 KP	Danu simples	2
Artigu 157 KP	Ameasa	1
Totál		20

2. Totál desizaun ne'ebé JSMP monitoriza : 12

Tipu Pena	Númeru
Prizaun	2
Suspensaun ba prizaun nia ezekusaun (artigu 68) KP	2
Multa (artigu 67) KP	1
Omologa dezisténsia keixa	6
Absolve	1
Totál	12

3. Total kazu sira ne'ebé adia tuir JSMP nia monitorizasaun : 3

Razaun adiamentu	Númeru
Lezadu ho testemuña la marka prezensa	2
Arguidu no lezada la marka prezensa	1
Totál	3

4. Totál kazu sira ne'ebé sei kontinua prosesu tuir JSMP nia monitorizasaun : 5

B. Deskripsaun sumáriu ba desizaun kazu sira

1. Krime danu simples

Nú. Prosesu : 390/PEN/16/TDS
 Kompozisaun Tribunál : Singulár
 Juis : Dr. Samuel da Costa Pacheco
 Prokuradór : Dr. Bartoromeo de Araújo
 Defeza : Dr. Albino de Jesus Pereira
 Tipu pena : Omologa dezisténsia keixa

Iha 01 Fevereiru 2017, Tribunál Distritál Suai prezide prosesu tentativa konsiliaun ba krime danu simples ne'ebé envolve arguidu MM, EMM, NM no AdC hasoru lezadu AdN, iha Distritu Covalima.

Akuzasaun husi Prokuradór

Prokuradór akuza katak iha 10 Agostu 2015, lezadu kondus bis no tula pazajeirus husi Dili ba Suai. Wainhira to'ó iha Zumalai - Suai, arguidu sira tuda fatuk dala 2 ba iha bis ne'ebé lezadu kondus. Aktu ne'e rezulta vidru janela rua rahun.

Prokuradór akuza arguidu kontra artigu 258 KP kona-ba danu simples ne'ebé ho moldura penal to'ó tinan 3 ka multa.

Produsaun ba provas

Antes tama ba produsaun ba provas, bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak deziste tiha keixa hasoru arguidu sira tanba antes ne'e sira iha ona akordu dame eskrita iha autóridade suku nia oin no intrega ona osan ho montante US\$250.00 hodi troka no hadia fali vidru ne'ebé rahun. Aleinde ne'e, arguidu sira husu diskulpa ba lezadu, arrepende ona sira nia hahalok, promete sei la repete krime hanesan iha futuru no konkorda ho pedidu dezistencia husi lezadu.

Alegasaun final

Prokuradór no Defeza konkorda ho akordu dame ne'ebé parte rua konkorda ona no husu ba Tribunál atu omologa prosesu ne'e.

Desizaun

Bazeia ba pedidu dezistencia hosi lezadu no akordu dame hosi arguidu sira no lezadu, Tribunál omologa dezistencia keixa ne'e

2. Kazu ofensa ba integridade física simples

Nú. Prosesu	: 324/PEN/2016/TDS
Kompozisaun Tribunál	: Singulár
Juis	: Dr. Nasson Sarmiento
Prokuradór	: Dr. Bartoromeu de Araujo
Defeza	: Dr. Albino de Jesus Pereira
Tipu pena	: Pena multa US\$45.00

Iha 06 Feveireiru 2017, Tribunál Distritál Suai prezide leitura sentensa ba krime ofensa ba integridade fízika simples ne'ebé envolve arguidu RMC hasoru nia feton (LC), iha Sub-Distritu Maukatar, Distritu Covalima.

Akuzasaun husi Prokuradór

Prokuradór akuza katak iha 06 Juñu 2016, arguidu haruka mensajen liuhusi telemovel ba lezada nia oan mane (arguidu ninia subriñu) katak nia-apa nia lisan ladiak. Tanba ne'e lezada no arguidu diskuti malu no arguidu dudu lezada nia kabas to'o lezada monu ba rai. Aktu ne'e rezulta lezada sofre kanek iha ain tur.

Prokuradór akuza arguidu kontra artigu 145 KP kona-ba krime ofensa ba integridade fizika simples ho moldura penál to'o tinan 3 ka multa.

Produsaun ba prova

Iha prosesu julgamentu arguidu rekoñese katak nia haruka duni mensajen no hakerek hanesan mensiona iha akuzasaun maibé rejeita nia dudu lezada. Tuir arguidu, lezada monu tanba arguidu hisik nia liman. Entretantu lezada kontinua reforsa faktus husi akuzasaun Prokuradór.

Testemuña MdC nu'udar lezada nia oan mane depoimenta katak nia simu duni mensajen husi arguidu no hakerek hanesan iha akuzasaun laran no hare ho matan arguidu dudu lezada to'o monu ba rai.

Alegasaun final

Prokuradór husu ba Tribunál atu kondena arguidu ho pena prizaun fulan 3 suspende ba tinan 1 tanba Prokuradór konsidera arguidu provadu komete krime hasoru lezada.

Enkuantu Defeza husu ba Tribunál atu absolve arguidu husi akuzasaun Prokuradór tanba konsidera arguidu la prienxe rekeztus husi krime ofensa ba integridade fízika simples. Aleinde ne'e, Dezefa mós husu ba Tribunál atu konsidera sirkunstansia atenuante husi arguidu katak arguidu kolabora diak ho Tribunál.

Desizaun

Depoizde avalia faktus hotu, Tribunál konklui katak arguidu provadu komete krime hasoru lezada no kondena arguidu ho pena multa US\$45.00. Pena multa ne'e sei selu gradualmente US\$1.00 kada loron durante loron 45. Wainhira arguidu la kumpri pena multa refere, sei kumpri iha prizaun durante loron 30 nu'udar pena alternativa. Aleinde ne'e Tribunál kondena arguidu, selu kustu judisiál US\$10.00.

3. Krime ofensa ba intergidade fízika grave

Nú. Prosesu : 408/PEN/16/TDS

Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Bartoromeu de Araujo
Defeza : Dr. Fransisco Caetano Martins
Tipu pena : Absolve

Iha 08 Feveireiru 2017, Tribunál Distritál Suai prezide leitura akordaun ba krime ofensa ba integridade fízika grave ne'ebé envolve arguidu AM hasoru lezadu CPA, iha Distritu Bobonaro.

Akuzasaun husi Prokuradór

Prokuradór akuza katak iha 12 Abril 2016, arguidu subar iha baleta kuak ida hodi hein lezadu. Wainhira lezadu ho motor liu atu lori hahan ba lezadu nia maun iha Diresaun Bombeirus, arguidu hapara tiha lezadu no tuda ho fatuk dala 2 iha lezadu nia ulun no ibun no rasta lezadu husi motor leten. Aktus ne'e rezulta lezadu sofre kanek iha ulun no ibun. Lezadu konsege hala'o tratamentu iha Ospital Nasional Guido Valadares Dili durante semana rua nia laran.

Prokuradór akuza arguidu kontra artigu 146 (letra e) KP kona-ba ofensa ba integridade fízika grave ne'ebé bele hamosu perigu ba ema nia vida ho moldura penál husi tinan 2 to'o tinan 8.

Produsaun ba provas

Iha prosesu julgamentu, arguidu nega totalmente faktus husi akuzasaun Prokuradór no deklarata katak iha momentu ne'ebá nia iha uma deit no la koñese lezadu. Aleinde ne'e, lezadu mós konfirma ho arguidu nia deklarasaun no deklarata katak la'os arguidu mak halo asaun hasoru nia no nia la koñese arguidu.

Alegasaun final

Prokuradór husu ba Tribunál atu absolve arguidu hosi krime ne'ebé Prokuradór akuza hasoru nia tanba arguidu la komete krime ne'e hasoru lezadu.

Aleinde ne'e, Defeza mós husu ba Tribunál atu absolve arguidu tanba konsidera la'os arguidu mak komete krime hasoru lezadu.

Desizaun

Depois avalia faktus hotu, Tribunál konklui katak faktus ne'ebé imputa ba arguidu la provadu. Tanba ne'e Tribunál absolve arguidu husi akuzasaun Prokuradór.

4. Krime danu simples

Nú. Prosesu : 308/PEN/16/TDS
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Bartoromeo de Araujo
Defeza : Dr. Albino de Jesus Pereira

Tipu pena : Omologa dezisténsia keixa

Iha 06 Feveireiru 2017, Tribunál Distritál Suai prezide prosesu tentativa konsiliaun ba krime danu simples ne'ebé envolve arguidu JdC hasoru lezada MdR, iha Distritu Covalima.

Akuzasaun husi Prokuradór

Prokuradór akuza katak iha 15 Dezembru 2015, lezada ba iha nia toos no hare arguidu sobu hela lezada nia lutu ne'ebé hada husi fatuk. Liutiha ida-ne'e, iha 28 Dezembru 2016, lezada nafatin hare arguidu kontinua sobu fatuk refere. Tanba ne'e iha loro-kraik lezada hamutuk ho nia bin ba iha arguidu nia uma hodi husu razaun arguidu sobu fatuk ne'e. Arguidu hatan katak nia sobu fatuk hirak ne'e tanba rai ne'ebé lezada uza hodi halo toos la'os lezada nia rai maibé arguidu nia inan sarani nia rai.

Prokuradór akuza arguidu kontra artigu 258 KP kona-ba danu simples ne'ebé ho moldura penál to'o tinan 3 ka multa.

Produsaun ba provas

Antes tama ba produsaun ba provas, bazeia ba artigu 262 KPP kona-ba tentativa ba konsiliaun, juis halo tentativa konsiliaun ba arguidu ho lezada.

Iha prosesu tentativa konsiliaun ne'e, lezada hakarak deziste tiha keixa hasoru arguidu tanba arguidu husu ona diskulpa ba lezada no promete sei la repete ninia hahalok ne'e iha futuru. Arguidu mós konkorda ho pedidu dezisténsia husi lezada.

Alegasaun finál

Prokuradór no Defeza konkorda ho parte rua nia akordu dame ne'e no husu ba Tribunál atu omologa prosesu ne'e.

Desizaun

Bazeia ba pedidu dezisténsia hosi lezada no akordu husi parte rua atu deziste keixa ne'e, Tribunál omologa dezisténsia keixa refere.

5. Krime tentativa omisídiu simples ho natureza violénsia doméstika

Nú. Prosesu	: 193/PEN/16/TDS
Kompozisaun Tribunal	: Koletivu
Juis	: Dr. Constâncio Barros Basmerly, Dr. Samuel da C. Pacheco no Dr. Nasson Sarmiento
Prokuradór	: Dr. Bartoromeu de Araújo
Defeza	: Dr. Albino de Jesus Pereira
Tipu pena	: Pena prizaun tinan 4

Iha 08 Fevereiru 2017, Tribunál Distrital Suai prezide leitura akordaun ba krime tentativa omisídiu simples ho natureza violénsia doméstika ne'ebé envolve arguidu CG hasoru nia feen, iha Distritu Covalima.

Akuzasaun husi Prokuradór

Prokuradór akuza katak iha 21 Dezembru 2016, iha kalan, lezada homan hela luhu hodi tau tabaku no arguidu tur iha lezada nia sorin. Arguidu husu ba lezada homan luhu kiik ka boot. Depoide ne'e arguidu ba foti katana ida no husi lezada nia kotuk ta'a dala 1 iha lezada nia kabas no dala 1 iha liman. Aktus ne'e rezulta lezada nia kabas kanek no liman fuan rua kotu. Depoide halo asaun ne'e, arguidu halai ba intrega-an kedas iha Polísia.

Prokuradór akuza arguidu kontra artigu 138 KP kona-ba omisídiu simples ho moldura penál hosi tinan 8 to'o 20, kontra artigu 23 kona-ba tentativa no konjuga artigu 2 LKVD kona-ba konseitu violénsia doméstika, artigu 3 LKVD kona-ba relasaun família, artigu 35 LKVD kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku.

Produsaun ba provas

Iha prosesu julgamentu, arguidu konfesa totalmente ba faktus husi akuzasaun Prokuradór no deklarara katak nia laiha intensaun atu oho lezada. Iha momentu ne'ebá nia oin nakukun no la hatene tiha nia-an.

Aleinde ne'e, lezada kontinua reforsa faktus husi akuzasaun Prokuradór nian no konfirma ho arguidu ninia deklarasaun katak arguidu iha moras ida ne'ebé sempre oin nanukun no la hatene tiha nia-aan.

Alegasaun finál

Prokuradór konsidera arguidu komete krime ne'e laho intensaun tanba ne'e husu ba Tribunál atu halo alterasaun jurídiku hosi krime tentativa omisídiu simples ba krime ofensa ba integridade fízika grave ne'ebé defini iha artigu 146 KP. Bazeia ba artigu 146 KP ne'e, Prokuradór husu ba Tribunál atu kondena arguidu ho pena prizaun tinan 6.

Iha parte seluk, Defeza husu ba Tribunál atu kondena arguidu ho pena prizaun tinan 4 tanba arguidu laiha intensaun oho lezada. Defeza mós husu ba Tribunál konsidera sirkunstánsia atenuantes hanesan arguidu kolobora diak ho Tribunál no arrepende ninia hahalok.

Desizaun

Depoide avalia faktus hotu, no Tribunál mós konsidera katak laiha relatóriu médiku ne'ebé hatudu katak arguidu sofre moras mental. Nune'e, Tribunál konklui katak arguidu provadu

komete krime tentativa omisídiu hasoru lezada. Bazeia ba provas ne'e, Tribunál kondena arguidu ho pena prizaun tinan 4.

6. Krime ofensa ba integridade fízika simples

Nú. Prosesu : 352/PEN/16/TDS
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Bartoromeo de Araujo
Defeza : Dr. Fransisco Caetano Martins
Tipu pena : Omologa dezisténsia keixa

Iha 09 Feveireiru 2017, Tribunál Distritál Suai prezide prosesu tentativa konsiliaun ba krime ofensa ba integridade fízika simples ne'ebé envolve arguida TdC hasoru lezada AC, iha Distritu Covalima.

Akuzasaun husi Prokuradór

Prokuradór akuza katak iha 25 Outubru 2015, arguida ho lezada diskuti malu kona-ba rai ne'ebé arguida nia alin hela. Tanba ne'e, arguida tuku dala 1 iha lezada nia inus rezulta ran. Arguida no lezada nu'udar família ka iha relasaun família.

Prokuradór akuza arguida kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

Produsaun ba provas

Antes tama ba produsaun ba provas, bazeia ba artigu 262 KPP kona-ba tentativa ba konsiliaun, juis halo tentativa konsiliaun ba arguida no lezada.

Iha prosesu tentativa konsiliaun ne'e, lezada deklara katak arguida husu ona diskulpa ba lezada no promete la repete ninia hahalok iha futuru. Tanba ne'e lezada hakarak deziste nia keixa hasoru arguida. Arguida mós konkorda ho lezada nia pedidu dezisténsia ne'e.

Alegasaun final

Prokuradór no Defeza konkorda ho parte rua nia akordu dame ne'e no husu ba Tribunál atu omologa prosesu refere.

Desizaun

Bazeia ba akordu dame hosi arguida no lezada no pedidu dezisténsia keixa hosi lezada, nune'e Tribunál omologa kazu ne'e.

7. Krime maus tratus ba kónjuje

Nú. Prosesu	: 244/PEN/15/TDS
Kompozisaun Tribunál	: Koletivu
Juis	: Dr. Argentino Luisa Nunes, Dr. Samuel da Costa Pacheco no Dr. Nasson Sarmento
Prokuradór	: Dr. Matias Soares
Defeza	: Dr. Albino de Jesus Pereira
Tipu pena	: Pena prizaun tinan 2

Iha 09 Fevereiru 2017, Tribunál Distritál Suai prezide leitura akordaun ba krime maus tratus ba kónjuje ne'ebé envolve arguidu JM hasoru nia feen, iha Distritu Ainaro.

Akuzasaun husi Prokuradór

Prokuradór akuza katak iha 15 Marsu 2015, arguidu lori kapasete tuda lezada nia ulun, tebe dala 2 iha lezada nia ibun, no rasta lezada nia-fuk. Aktus ne'e rezulta moras iha ulun no bubu iha lezada ibun.

Prokuradór mós akuza katak antes ne'e iha 05 Agostu 2014, lezada husu osan ba arguidu atu sosa susu-ben ba sira nia-oan maibé arguidu hatan katak osan laiha no arguidu tuku dala 1 iha lezada nia kotuk laran, tebe kois dala 1 iha lezada nia kidan. Aktus ne'e rezulta moras iha lezada nia kotuk laran.

Aleinde ne'e, iha 07 Agostu 2014, lezada foti arguidu nia osan US\$5.00 hodi sosa omu fase ropa nian, nune'e arguidu tebe dala 1 iha lezada nia ibun no tuku dala 1 iha kanoruk. Aktus ne'e rezulta lezada sofre moras iha lezada nia kanoruk, kanek nomos bubu iha lezada nia ibun.

Tuir-mai iha 13 Agostu 2014, lezada foti arguidu nia osan US\$0.75 hodi sosa modo no arguidu tebe no tuku dala barak iha lezada nia isin lolon. Aktus ne'e rezulta bubu iha lezada nia isin lolon.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál hosi tinan 2 to'o tinan 6 no konjuga ho artigu artigu 2 LKVD kona-ba konseitu violénsia doméstika, artigu 3 LKVD kona-ba relasaun família, artigu 35 LKVD kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku.

Produsaun ba provas

Iha prosesu julgamentu, arguidu konfesa faktu balun no rejenta faktu balun. Arguidu konfesa faktus sira ne'ebé akontese iha 15 Marsu 2015, 05 Agostu 2014 no 07 Agostu 2014. Entretantu kona-ba akontesimentu iha 13 Agostu 2014, arguidu rejenta no deklara katak nia basa dala 1 iha

lezada nia hasan no tuku dala 1 iha lezada nia kotuk laran. Enkuantu lezada kontinua reforsa faktus husi akuzasaun Prokuradór.

Alegasaun final

Prokuradór husu ba Tribunál atu kondena arguidu ho pena prizaun efetiva tinan 5. Prokuradór husu pena refere atu prevene arguidu la repete ninia hahalok iha futuru tanba konsidera arguidu halo tratamentu ladiak hasoru lezada.

Entretantu, Defeza husu ba Tribunál atu aplika suspensaun hosi pena prizaun ba arguidu tanba arguidu konfesa katak nia komete duni krime hasoru lezada, maibé nia arrepende ona nia hahalok no foin primeira-ves hatan iha Tribunál.

Desizaun

Depoide avalia faktus sira, Tribunál konsidera katak arguidu provadu komete duni krime hasoru lezada. Bazeia ba provas ne'e, Tribunál kondena arguidu ho pena prizaun tinan 2 no kondena arguidu selu kustu judisiál US\$25.00.

8. Krime ofensa ba integridade fízika negligente

Nú. Prosesu	: 110/PEN/16/TDS
Kompozisaun Tribunál	: Singulár
Juis	: Dr. Argentino Luisa Nunes
Prokuradór	: Dr. Bartoromeo de Araujo
Defeza	: Dr. Manuel Amaral
Tipu pena	: Pena prizaun tinan 1 suspende tinan 1

Iha 16 Feveireiru 2017, Tribunál Distritál Suai prezide leitura sentensa ba krime ofensa ba integridade fízika negligente ne'ebé envolve arguidu JdN hasoru nia feen, iha Distritu Covalima.

Akuzasaun husi Prokuradór

Prokuradór akuza katak lezada impresta ema nia osan no arguidu laiha konesimentu, nune'e, arguidu tuku dala 1 iha lezada nia inus. Aktu ne'e rezulta moras iha lezada nia inus.

Prokuradór akuza arguidu kontra artigu 145 KP kona-ba ofensa ba integridade fízika simples konjuga ho artigu artigu 2 LKVD kona-ba konseitu violénsia doméstika, artigu 3 LKVD kona-ba relasaun família, artigu 35 LKVD kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku.

Produsaun ba provas

Iha prosesu julgamentu, arguidu deklara katak nia la tuku lezada. Arguidu hatutan katak nia hisik liman mak kona iha lezada nia inus. Aleinde ne'e, lezada mós konfirmadu ho arguidu ninia deklarasaun.

Antes tama ba alegasaun finál, Prokuradór husu ba Tribunál atu halo alterasaun jurídiku husi artigu 145 KP konjuga ho LKVD ba fali artigu 148 kona-ba ofensa ba integridade fízika negligente. Prokuradór konsidera arguidu laiha intensaun tuku lezada.

Alegasaun finál

Prokuradór konsidera krime ne'e akontese laho intensaun maibé atu prevene krime iha futuro Prokuradór husu ba Tribunál atu kondena arguidu ho pena prizaun fulan 3 suspende ba tinan 1.

Aleinde ne'e, Defeza konkorda ho alegasaun husi Prokuradór no husu ba Tribunál atu aplika pena multa ba arguidu tanba arguidu komete krime ne'e laho intensaun, arrepende nia hahalok no foin primeira-ves hatan iha Tribunál.

Desizaun

Depois avalia faktus hirak ne'e hotu, Tribunál konkorda ho pedidu alterasaun jurídiku husi Prokuradór nian no kondena arguidu ho pena prizaun tinan 1 suspende ba tinan 1 inklui selu kustu judisiál US\$25.00.

9. Krime ofensa ba integridade fízika simples

Nú. Prosesu	: 298/PEN/16/TDS
Kompozisaun Tribunál	: Singulár
Juis	: Dr. Alvaro Maria Freitas
Prokuradór	: Dr. Bartoromeu de Araújo
Defeza	: Dr. Albino de Jesus Pereira
Tipu pena	: Omologa dezisténsia keixa

Iha 17 Feveireu 2017, Tribunál Distritál Suai prezide prosesu tentativa konsiliaun ba krime ofensa ba integridade fízika simples ne'ebé envolve arguidu AB no LMA hasoru lezadu BA, iha Distritu Covalima.

Akuzasaun husi Prokuradór

Prokuradór akuza katak iha 01 Abril 2016, lezadu ho nia kolega ida kesi hela manu atu lori ba faan iha Merkadu Suai. Derepentni arguidu AB aperta lezadu nia kakorok no tuku dala 1 iha lezadu nia kakorok. Entretantu arguidu LMA tebe dala 2 iha lezadu nia kotuk laran no kabun to'o lezadu monu kedas ba rai. Aktus ne'e rezulta lezadu sofre moras iha kanuruk, kotuk laran no kabun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan tinan 3 ka multa.

Produsaun ba provas

Bazeia ba artigu 262 KPP kona-ba tentativa ba konsiliaisaun, antes tama ba produsaun ba provas, juis halo tentativa konsiliaisaun ba arguidu ho lezadu.

Iha prosesu tentativa konsiliaisaun ne'e, lezadu deklara katak arguidu sira husu ona diskulpa ba lezadu no promote sei la repete sira ninia hahalok ne'e iha future. Bazeia ba pedidu ne'e lezada hakarak deziste fali nia keixa hasoru arguidu sira. Aleinde ne'e, arguidu sira mós konkorda ho lezadu nia pedidu dezisténsia ne'e.

Alegasaun final

Prokuradór no defeza konkorda ho parte sira nia akordu ne'e no husu ba Tribunál atu omologa prosesu refere.

Desizaun

Bazeia ba akordu hosi parte rua no pedidu dezisténsia hosi lezadu, Tribunál konklui no omologa dezisténsia keixa ne'e.

10. Krime ameasa

Nú. Prosesu	: 428/PEN/16/TDS
Kompozisaun Tribunál	: Singulár
Juis	: Dr. Argentino Luisa Nunes
Prokuradór	: Dr. Bartoromeu de Araujo
Defeza	: Dr. Fransisco Caetano Martins
Tipu pena	: Omologa dezisténsia keixa

Iha 17 Feveireu 2017, Tribunál Distritál Suai prezide leitura sentesa ba krime ameasa ne'ebé envolve arguidu BG hasoru nia tian (RBM), iha Distritu Covalima.

Akuzasaun husi Prokuradór

Prokuradór akuza katak arguidu la kontente ho atetudu husi lezada nia laen ne'ebé la fahe osan indemnizasaun sivíl husi estadu ba rai família nian ne'ebé estadu foti hodi halo estrada (*jalan tol*). Tanba ne'e, iha 28 Agostu 2016, arguidu ba iha lezada nia viziñu nia uma no hakilar ba lezada nia uma katak sei oho lezada, lezada nia laen no nia oan sira hotu. Lezada senti tauk no halai ba iha membru UPF ida nia uma no husi ne'ebá kontaktu kedas ba iha polisia.

Prokuradór akuza arguidu kontra artigu 157 KP kona-ba ameasa ho moldura penál to'o tinan 1 ka multa.

Produsaun ba provas

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, antes tama ba prosesu produsaun, juis husu ba parte sira atu halo tentativa konsiliaun.

Iha prosesu tentativa konsiliaun ne'e, lezada deklara katak nia hakarak deziste tiha keixa hasoru arguidu tanba arguidu husu ona diskulpa no promete la repete ninia hahalok iha futuru. Tanba Aleinde ne'e, arguidu mós konkorda ho lezada nia pedidu dezisténsia ne'e.

Alegasaun final

Prokuradór no Defeza konkorda ho parte rua nia akordu dame ne'e no husu ba Tribunál atu omologa prosesu refere.

Desizaun

Bazeia ba akordu dame hosi arguidu no lezada, no pedidu dezisténsia keixa hasoru arguidu, nune'e, Tribunál omologa kazu ne'e.

11. Krime ofensa ba integridade fízika simples ho natureza violénsia doméstika

Nú. Prosesu	: 225/PEN/16/TDS
Kompozisaun Tribunál	: Singulár
Juis	: Dr. Argentino Luisa Nunes
Prokuradór	: Dr. Bartoromeu de Araujo
Defeza	: Dr. Albino de Jesus Pereira
Tipu pena	: Pena prizaun fulan 6 suspende tinan 1

Iha 17 Fevereiru 2017, Tribunál Distritál Suai prezide leitura sentesa ba krime ofensa ba integridade fízika simples ho natureza violénsia doméstika ne'ebé envolve arguidu ALM hasoru nia feen, iha Distritu Covalima.

Akuzasaun husi Prokuradór

Prokuradór akuza katak iha 05 Dezembru 2015, arguidu trata aat lezada wainhira rona informasaun katak lezada toba ho mane seluk. Lezada la simu arguidu nia liafuan ne'e no tuir arguidu ba iha xefi aldeia nia uma. Iha ne'ebá lezada dudu monu arguidu husi kadeira. Arguidu hamrik no tuku dala 3 iha lezada nia kanuruk parte karuk no basa dala 2 iha hasan. Aktus ne'e rezulta lezada sofre moras iha kanuruk no hasan.

Prokuradór akuza arguidu kontra artigu 145 KP kona-ba ofensa ba integridade fízika simples konjuga ho artigu artigu 2 LKVD kona-ba konseitu violénsia doméstika, artigu 3 LKVD kona-ba relasaun família, artigu 35 LKVD kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku.

Produsaun ba provas

Iha prosesu julgamentu, arguidu konfesa totalmente ba faktus husi akuzasaun Prokuradór no deklara katak nia arrepende ba ninia hahalok. Aleinde ne'e, lezada kontinua reforsa akuzasaun Prokuradór nian.

Alegasaun final

Prokuradór husu ba Tribunál atu kondena arguidu ho pena prizaun fulan 3 suspende ba tinan 1 nu'udar prevensaun ida ba arguidu atu la repete ninia hahalok ne'e iha futuru.

Entretantu, Defeza husu ba Tribunal atu aplika pena admoestasaun ba arguidu tanba konsidera sirkunstansia atenuantes hanesan arguidu konfesa, arrepende ninia hahalok, kolabora diak ho Tribunál no foin permeira-vez hatan iha Tribunál.

Desizaun

Depois avalia faktus sira durante julgamentu, Tribunál prova katak arguidu komete duni krime hanesan faktus husi akuzasaun Prokuradór no kondena arguidu ho pena prizaun fulan 6 suspende ba tinan 1.

12. Krime ofensa ba integridade física simples

Nú. Prosesu	: 342/PEN/16/TDS
Kompozisaun Tribunál	: Singulár
Juis	: Dr. Constáncio Barros Basmary
Prokuradór	: Dr. Matias Soares
Defeza	: Dr. Manuel Amaral
Tipu pena	: Omologa dezisténsia keixa

Iha 22 Feveireiru 2017, Tribunál Distritál Suai liuhosi Tribunál Movel iha Distritu Manufahi prezide prosesu tentativa konsiliaun ba krime ofensa ba integridade física simples ne'ebé envolve arguidu JdC, AdC, FG, CC, DdS no MSS hasoru lezadu IdS iha Distritu Manufahi.

Akuzasaun husi Prokuradór

Prokuradór haktuir katak iha 16 Maiu 2016, lezadu ba sosa bee iha kios wainhira hein nia avo moras iha ospital. Depoisde fila husi kios, iha dalan klaran, arguidu sira duni no kaer toman lezadu no rasta lezadu nia kamizola no tuku tebe iha lezadu nia ulun parte karuk, matan fukun, reen-toos, ibun no tilun. Aktu hirak ne'e rezulta lezadu sofre moras iha nia tilun, reen-toos no ulun no kanek iha ibun no matan fukun.

Prokuradór akuza arguidu kontra artigu 145 KP kona-ba ofensa ba integridade física simples ne'ebé ho nia moldura penál to'o tinan 3 ka multa.

Produsaun ba provas

Iha prosesu konsiliaisaun ne'e, lezadu hakarak deziste tiha keixa hasoru arguidu sira maibé arguidu sira tenke selu fila fali nia sofrémentu ho montante US\$600,00 no ba kada arguidu hetan US\$100.00. Arguidu sira husu diskulpa ba lezadu, arrepende no promete sei la repete krime hanesan iha futuru no konkorda ho pedidu dezisténsia husi lezadu no prontu atu selu osan refere.

Antes ne'e, arguidu sira no lezadu tur hamutuk ona atu rezolve kazu ne'e maibé tanba arguidu na'in rua la marka prezensa (hala'o hela estudu iha rai liur) nune'e la konsege iha konkordansia ba malu.

Alegasaun final

Prokurador no Defeza konkorda ho parte rua nia akordu dame ne'e, no husu ba tribunál atu omologa prosesu refere.

Desizaun

Bazeia ba akordu dame hosi arguidu sira no lezadu, no pedidu dezisténsia keixa hasoru arguidu, nune'e, Tribunál omologa kazu ne'e.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl